

度

日

文

Хул 1934.

Спровождени бремени
христіанами

Шкафъ III

Некшъ
1880.

№ 11 19966 40 1934

度日文

教眾平居度日，須自早至晚爲所當爲，不可稍有安閒廢惰之時，使私情乘閒竊發，誘我趨不善之途。蓋日以軀靈要務存於心，常如天主在上在旁，視我聽我，鑒察於我。如此，尙敢有妄思妄言妄行乎？首宜逐日誦經，爲心目能明道理，言行克守矩規，隨時祈禱，爲生前永獲安和，身後常膺福

ms. 10000 18370.

樂要知身受之逆境不常豈可圖一時之快意遂棄再世之常生人世之光陰有限能忍數年之艱辛卽享無窮之榮耀是以視度一日當如度一生儻晝行有失誤至臨寢時不復能救挽亦如壯歲犯罪愆至臨終時不暇行補贖故須及時行善改過不得推諉因循以至後悔莫及日日如此想則一生作事自能謹慎不敢怠荒縱逸

矣蓋好善惡惡人心所同務存公善之志人勸化己亦以之勸化人值違理之行己責斥人亦望其責斥己體天主好惡之公好所當好惡所當惡不應徇己之偏情遵天主是非之誠是則爲是非則爲非不敢拂人而獨斷勿以善小而不屑爲善雖小而心能向善則其德不小勿以惡輕而敢妄作惡雖輕而志常趨惡則其罰非輕勿

以任重而生畏，不推諉，則積漸可成。勿以力薄而難勝，無閒斷，則途長克至。勿恃善自詡，勿怙惡不悛，勿偽善以干譽，勿飾非以欺人。勿受異端之誘，遇誘倍嚴其防，則惡萌自少。勿畏外教之譏，遇譏彌篤其守，則信量自增。褒貶勿不真，是非勿顛倒，求恩勿尅期，遲速聽命，改過勿寬限，晝夜兼程，忿時必多違理，且恐後結讎，爭時必求

勝人，且當前招怨，已于人有虧，則急往謝過。人與人有隙，則代爲解和。評人者亦被人評，切勿諱己惡而没人善。妬人者亦招人妬，切勿形人短而炫己長。至於行己待人之際，倍宜公恕誠厚，蓋人生皆有本分，盡職業乃有可表白，作事各有專責，竭力斯不負委任，品行宜端，心術宜正，貧則無諂，且勿輕藐貧寒，而常懷矜恤之心，富

則無驕且勿逢迎富勢而每進箴規之語
無人不當矜憐倍留意孤嫠困苦始克副
天主矜憐我之寵恩無時不可賙卹更盡
心愁病災危乃不悖天主賙卹人之公義
遇苦禍最忍耐心毋怨對主之嘗試恆祈
佑護使力克勝遇休福懷警惕念宜感謝
主之寵恩更求啟牖盡心謀善切勿施恩
望報欠債不還重已輕人損人利己矯情

以干譽違理以取悅匿怨相友藏奸相欺
以惡償善恃強凌弱負恩復仇忍心害理
以謗誣洩忿以善勞自矜黨惡加功遇難
不救惟當孝親敬長老安少懷戚友當互
相和睦但勿時常宴樂致耗貲財子女宜
時加教養不得徒知溺愛致蹈姑息作謀
勿自用作事勿自尊胥遵規誠自視爲不
堪自思爲無益豈敢矜誇至於生財用財

之道尤須謹慎。夫日用藉財以養生，天主知其爲人所需，必皆如數以賜，惟求今日足用，勿爲明日過慮，但宜善謀生財之道，不可妄起貪利之心，量入爲出，出入胥由正理，乃無悖入悖出之患，惟勤以裕財之源，儉以節財之流，方能久遠安富，不致困窮。若祇知貪求便宜，不遵誠命，存各奸私之心，以竊取之，必爲天主所怒，將迷亂其

性情，罰使受諸誘惑，併平素所積之財，一旦奢侈揮霍，妄好世樂，以耗費之，是徒受貪利之名，而無享福之實，乃知少費無益之用，卽係多得，輕拋易來之貲，直如未得，此非獨惜福以圖久遠，並可節省以濟貧寒，若論衣食，止求飽煖而已，不必華美以悅人之觀瞻，豐腴以姿己之口腹，切勿相與好虛浮炫，非分衣冠以爲麗，羣居任饜

饗誇珍奇食飲以爲歡遇殷富時則當擲節禁止奢靡留以預防後來遇窘迫時則當忍耐減除嗜慾免致貪謀非義因富厚乃主恩所賜天主以之輔助善良勿誇貴力惟積善乃可保存困乏乃己罪所招天主以之警惕愚妄無可怨尤惟改悔始能回挽推之酬應世情婚喪祇當稱量家貲以盡禮慶弔不過藉託儀物以表情豈可

飾一時之觀聽而遺無數之貽累豈可求爭強於親友而耗素積之銀錢因天主賦人以生命復養人以布帛菽米原爲人於無憂無慮後克行天主所悅之事若止終日昏庸醉夢羣居言不及義好行小慧不知振奮精神遵循誠律以圖善功天主詎肯以此有益之恩賜此無用之人似此者不俟身後受罰卽生前亦必加以苦災以

警示之矣。是以我眾當守教規，不可蹈一切好酒貪淫，佚遊賭博等害。己身既修，而後齊家，內而父兄子弟，外而戚友鄉鄰，以及婦女僕婢，皆當勸其盡心聖事，以期得救。此卽所謂愛人如己，並以天主十誠，眞福九端，用紙按條排寫，貼于墻壁，日間所行之事，有犯某誠者，或有背某福者，隨依類於某誠某福下，畫一尖鈎以記之。至月

終合計若干事犯罪，自可觸目儆心，有所戒慎恐懼，不至無知妄作。臨痛悔告解時，亦不至遺忘。但畫記時，須秉公誠正直，不可諱飾以自欺，且欺人欺主。久之，併九福十誠，亦可熟習不忘。夫人之功罪，至大審判日始定，然不待大審判日，卽可自知。蓋天主之喜怒，雖不可見，第行人情所共喜，順理之事，自必爲天主所喜，儻行人情所

共怒違理之事亦必爲天主所怒揆以眾
人情理之正卽合天主義道之公天主於
此等人生前有不賜以人世之福死後有
不速引之入天國之路者乎

不速引之入天國之路者乎
不速引之入天國之路者乎
不速引之入天國之路者乎
不速引之入天國之路者乎
不速引之入天國之路者乎

